

UNIDADE

1

O grego no espazo e no tempo

ÍNDICE DE CONTIDOS

1. A LINGUA GREGA
2. HISTORIA DO ALFABETO
3. ESCRITURA E PRONUNCIA DO GREGO
4. MARCO XEOGRÁFICO DE GRECIA

Ἐξηῦρον αὐτοῖς γραμμάτων τε συνθέσεις, μνήμην ἅπαντων,
Inventei para eles tamén a combinación das letras, que permite recordar todas as cousas.
Esquilo, *Prometeo encadeado*



Rubens, *Saturno devorando a un fillo*

O Tempo, dono e señor do universo, devoraba ao seu paso a todas as súas criaturas. Moitos, nobres e extraordinarios fillos naceron deste pai desapiadado, pero ningún escapaba á súa vontade destrutora. Ata que un día un deles, o Pensamento, ideou un arma poderosísima para eludir a ira paterna. Chamou ao seu invento escritura e con ela someteu e destronou ao seu proxenitor.

A **escritura** é escudo do pensamento contra a voracidade do tempo

Nesta unidade tes unha detallada información para ver ata que punto se cumpre a historia anterior. A comparación das linguas descubriunos o **indoeuropeo**, e o contacto co mundo semítico facilitounos o **alfabeto**.

Estes fenicios, que chegaron con Cadmo, aportaron aos helenos, entre outros coñecementos, tamén as letras, que antes os helenos non tiñan: en primeiro lugar, aquelas que usan tódolos fenicios, pero despois, andando o tempo, xunto cos sons modificaron tamén a forma das letras. Dos helenos usaban as letras fenicias os xonios e decidiron chamalas caracteres fenicios.

HERÓDOTO, *Historias*, V, 58

Esta unidade será como unha introdución para que poidas situar axeitadamente no seu marco histórico e xeográfico a lingua grega e coñecer as vicisitudes da súa evolución. Tes, ademais, un extenso apartado sobre a orixe da escritura.

Para poder ler axeitadamente os textos gregos debes prestar atención non só ao alfabeto, senón tamén aos **espíritos** e aos **acentos**, xa que, como en galego, o acento do grego é **significativo**, é dicir, que dúas palabras poden distinguirse só polo acento (pensa en exemplos do galego como cantara, cantará).

1. O grego e as linguas indoeuropeas

1.1. O grego e as linguas indoeuropeas


O grego procede do **indoeuropeo**, hipotética lingua primitiva, que debeu de falarse en Europa Central alá polos milenios IV e III a.C. En sucesivas migracións, os indoeuropeos estendéronse pola maior parte de Europa, Asia occidental e a India, dando lugar a diferentes grupos de linguas, descendentes dese tronco común. Estas linguas, chamadas **indoeuropeas**, son:

- Indoiranio: sánscrito, antigo persa...
- Eslavo: ruso, polaco, búlgaro, checo...
- Xermánico: alemán, inglés, holandés, sueco, danés...
- **Latín**, do que derivan as linguas románicas, romances ou neolatinas: castelán, galego, portugués, catalán, francés, italiano, romanés ...
- Celta: galés, irlandés, bretón...

O trazo característico destas linguas é o seu carácter flexivo, organizando a súa flexión en dous sistemas:

- sistema nominal ou **declinación**.
- sistema verbal ou **conxugación**.

Mapa dos dialectos indoeuropeos antigos



Mapa dos dialectos indoeuropeos modernos



1.2. O grego e os seus dialectos

Os documentos máis antigos que conservamos do grego están escritos en **micénico**, descuberto en táboas finas de barro achadas en diversos lugares de Grecia e datadas arredor do s. XIV a.C. Trátase dun grego escrito nun sistema **silábico**, chamado **lineal B**, que foi descifrado polos ingleses M. Ventris e J. Chadwick en 1952.

Este sistema de escritura desapareceu coa caída dos reinos micénicos e, a partir do s.VIII a.C., foi substituído por un sistema de escritura **fonética**, no que cada signo representa un son, coa anotación das vogais: o **alfabeto**.

Pero o grego non é unha lingua unificada, senón que ten **dialectos**, que podemos dividir en catro grupos:

1. **Dorio e grego do Noroeste**: Falado no Peloponeso (agás en Arcadia), no NW. de Grecia e na zona sur de Asia Menor chamada Dóride.
2. **Arcadio-chipriota**: Falado en Arcadia e na illa de Chipre. Non tivo uso literario.
3. **Eolio**: Falado en Beocia, Tesalia, na zona norte de Asia Menor (Eólida) e en Lesbos.
4. **Xónico-ático**: Falado en Ática, Eubea, illas do Exeo (Cícladas, etc) e na zona central de Asia Menor, que por iso recibe o nome de Xonia. O **ático** é o dialecto de Atenas na época clásica e por iso acadou un gran desenvolvemento literario e predominio cultural.

Na Época Helenística, todos estes dialectos conflúen nunha lingua común, a **Koiné**, que se impuxo como lingua oficial do Imperio de Alexandre Magno. Está baseada maiormente no dialecto ático, con algunhas achegas do xonio

Desta lingua deriva, cos cambios fonéticos e morfolóxicos debidos ao paso do tempo, o **grego moderno**, que é ao grego antigo o que pode ser o castelán actual á lingua do *Cantar do Mío Cid*.



Realiza a πράξις 1

2. Historia do alfabeto

2.1. A escritura

Tódolos seres humanos posúen unha lingua, pero non todos a escriben. A historia da linguaxe é moi antiga, pero a da escritura é moito máis recente.

A arte de escribir xorde en sociedades urbanizadas. O sistema de escritura máis antigo que conservamos é o dos **sumerios**, que habitaron Mesopotamia desde mediados do IV milenio a.C.

No mundo hai diferentes linguas e diferentes sistemas de escritura: hoxe un chinés, un árabe, un ruso ou un inglés escriben, pero usan sistemas de escritura diferentes.

2.2. Historia da escritura

A escritura é unha das máis altas conquistas logradas polo home. Grazas a ela puido superar as barreiras do espazo e do tempo e trazar os fundamentos do progreso.

Nun senso amplo podería definirse a escritura como a **forma humana de comunicación mediante signos visibles**. Hai escritura tanto na frecha pintada nunha árbore para indicar o camiño, coma no máis sofisticado programa de ordenador; na pintura da Cova de Altamira, coma na derradeira novela de Saramago.

2.2. Comunicación oral e escrita

En toda comunicación humana interveñen tres elementos: un **emisor**, un **receptor** e unha **canle** de comunicación.

Na comunicación **oral**, a relación emisor-receptor establécese mediante o son e os xestos, o que a fai máis inmediata e próxima, pero vinculada a un son e a unha imaxe fugaces.

Na escritura, esa relación prodúcese a través dunha imaxe gravada; isto faina resistente ao paso do tempo, trasladable no espazo e incluso modificable e reproducible coa maior exactitude.

2.3. Canles complementarias

Ámbalas canles son complementarias: a primeira é inmediata e non precisa elementos alleos a nós; por iso resulta o máis adecuado para a comunicación espontánea e cotiá, pero require desde o principio aterse a un *sistema*, a un *código*, a un *idioma*, cuxo descoñecemento impide a comprensión, e isto limita o número de persoas capaces de usalo.

A escritura precisa materiais alleos ao emisor –unha superficie sobre a que escribir e un obxecto con que facelo–, sendo, por iso, menos axeitada para a comunicación inmediata; en cambio, baixo certas formas elementais, a escritura permítenos a comunicación sen coñecer un idioma, e, por outra banda, é posible salvar dúas grandes dificultades: o *espazo* e o *tempo*. Permite controlar máis cantidade de información e facer un uso máis ordenado dela, así como

repetila con precisión cando queiramos. Finalmente, permite ao emisor e ao receptor comunicarse cando por algún motivo non poden facelo polo sistema oral.

2.4. Importancia da escritura

A escritura é unha das bases da organización social do home e o seu nacemento e progreso foi paralelo ao dela. A diferenza entre sociedades con escritura e sociedades ágrafas (sen escritura) é evidente en sociedades que, coma a grega micénica, desenvolveron un sistema de escritura cando a organización social e administrativa llo esixía; pero, desaparecida esta, a escritura desapareceu con ela para xurdir uns trescentos anos máis tarde, aínda que agora cun sistema *alfabético*, non *silábico* como era o micénico. Resumindo, podemos dicir que, se pola necesidade de comunicarnos falamos, pola de asociarnos escribimos.

2.5. Orixe e primeiros pasos da escritura

A escritura foi o resultado dun longuíssimo proceso, cuxos antecedentes se perden na prehistoria. Os restos máis antigos de certos indicios de escritura acháronse en *Mesopotamia*, a rexión entre os ríos Tigris e Éufrates. Tales restos, cuxa data se estima contra o 8500 a.C., son marcas feitas en ósos de animais e figuras xeométricas, como discos, conos ou cubos de barro, que servían seguramente para levar unha elemental contabilidade.

Tamén as mostras máis antigas de verdadeira escritura –as figuras citadas son só o preludio– apareceron na rexión meridional de Mesopotamia. Alí estableceuse, a finais do quinto ou principio do cuarto milenio a.C., un pobo que a historia coñece como **sumerio**, e Súmer, a rexión que habitaba. Este pobo foi o primeiro capaz de reproducir en imaxes –**pictogramas**– o seu pensamento a finais do cuarto milenio (contra 3200 a.C.) en Uruk, a súa capital.

Con este paso dos sumerios a humanidade entraba na historia.

2.6. Tipos de escritura

Os principais sistemas de escritura utilizados ao longo da historia son os seguintes:

- **pictográfica**: cada signo representa un obxecto concreto
- **ideográfica**: Cada signo simboliza un concepto ou idea e representa unha palabra. A este grupo pertence o *sumerio*.

- **xeroglífica**: os *xeroglíficos exipcios* son uns cen anos posteriores á escritura sumeria; tamén son deste tipo o *chinés* actual, así como os *sinais de tráfico* e os *xeroglíficos* da prensa diaria.
- **silábica**: Entre 1500 e 1000 aparecen novos sistemas de escritura que representan un avance sobre os anteriores, porque reducen o número de signos. A este grupo pertencen, no ámbito xa grego, a escritura **cretense** ou *lineal A* (s. XVI a.C.), a **micénica** ou *lineal B*, usada en Grecia continental (s.XIV a.C.) e os silabarios **chipriotas** (s.VIII a.C.)
- **alfabética**: A finais do segundo milenio os pobos situados entre Exipto e Siria chegaron, por camiños diferentes, á escritura alfabética, na que cada signo tenta de representar un fonema. Este é un sistema moito máis evolucionado e útil: cun escaso número de signos (entre 20 e 35) pódese formar un número infinito de palabras. Os **fenicios**, expertos comerciantes que precederon aos gregos na colonización do Mediterráneo, usaron este sistema.

2.7. A invención do alfabeto

Pouco máis tarde do ano 1000 a.C., os gregos entran en contacto cos fenicios e adaptaron o sistema fenicio á súa lingua cun senso práctico:

- Os signos que coincidían en ámbalas dúas linguas mantivéronse.
- Os que non coincidían usáronse para outros signos ou con valor numérico.
- Creáronse varios signos novos para representar tódolos sons; iso explica a orde das letras.
- Como novidade, os gregos usaron diversos signos fenicios para representar as **vogais**, xa que o fenicio, por ser lingua semítica, só notaba as consoantes

Realiza a πράξις 2

3. Escritura e pronuncia do grego

3.1. O alfabeto grego

Maiúsculas	Minúsculas	Nome Grego	Nome	Transcr. Lat	Transcr. Galego
A	α	ἄλφα	alfa	a	a
B	β	βέτα	beta	b	b
Γ	γ	γάμμα	gamma	g	g, x
Δ	δ	δέλτα	delta	d	d
E	ε	ἒ ψιλόν	epsilón	e (breve)	e
Z	ζ	ζῆτα	dseta	z,c	z,c
H	η	ῆτα	eta	e (longo)	e
Θ	θ	θῆτα	zeta	th	t
I	ι	ἰῶτα	iota	i	i
K	κ	κάππα	kappa	c,qu,k	k, c
Λ	λ	λάμβδα	lambda	l	l
M	μ	μῦ	mü/mi	m	m
N	ν	νῦ	nü/ni	n	n
Ξ	ξ	ξῖ	xi	x	x
O	ο	ὀ μικρόν	omikron	o (breve)	o
Π	π	πί	pi	p	p
P	ρ	ῥῶ	ro	r	r
Σ	σ	σίγμα	sigma	s	s
T	τ	ταῦ	tau	t	t
Υ	υ	ῡ ψιλόν	ypsilón	y	i
Φ	φ	φῖ	fi	ph	f
X	χ	χῖ	ji	ch	c, qu
Ψ	ψ	ψῖ	psi	ps	ps, s
Ω	ω	ὦ μέγα	omega	o (longo)	o

(1) ι-, υ-, iniciais ante vogal adoitan transcribirse por x :
ἱερογλυφικός, ὑάκινθος : xeroglífico, xacinto

3.2. Observacións

- A grafía -ς úsase só en fin de palabra; nas demais posicións (inicial e interior) emprégase σ (exemplo: σοφία, κόσμος, πόλις).
- A gamma (γ), cando precede a γ, κ, χ, ξ pronúnciase como “n”: exemplos: ἄγκυρα, ἄγγελος, ἄγχι, Σφίγξ. (áncüra, ánguelos, ánghi, esfinx).

- A dobre (λλ) pronúnciase como dobre “l”, non como “ll” (ex.: ἄλλος, al-los).
- Os ditongos lense au, eu (ex.: αὐτός, λευκός); o ditongo ου lese u (ex.: οὐρανός).
- As grafías ψ, ξ, ζ representan consoantes dobres: ps, ks, ds/sd respectivamente.

3.3. Clasificación dos fonemas

- As consoantes

OCCLUSIVAS	sonoras	xordas	aspiradas
labiais	β	π	φ (/ph/)
dentais	δ	τ	θ (/th/)
velares/guturais	γ	κ	χ (/kh/)

Nasais: μ (labial), ν (dental)

Líquidas: λ (lateral), ρ (vibrante)

Sibilante: σ, ς

- As vogais

As vogais simples poden ser:

a) pola cantidade: -breves: ε, ο, α, ι, υ.

- longas: η, ει, ω, ου, ᾱ, ῑ, ῡ.

b) pola abertura: - abertas: α, η, ω.

- pechadas: ε, ει, ι, ο, ου, υ.

- Os ditongos:

a) De primeiro elemento breve: αι, ει, οι, αυ, ευ, ου, υι


b) De primeiro elemento longo: αι, ηι, ωι, ηυ

Nota: Nos ditongos co primeiro elemento longo a “iota” escríbese debaixo da vogal longa minúscula (“iota subscrita”), ou despois da vogal longa maiúscula (“iota adscrita”), e non se pronuncia: ᾗδω, ῥδή, Ᾱιδης.


Transcrición dos ditongos

GREGO	LATÍN	GALEGO
αι: αἰθήρ	e: aether	e: éter
αυ + vogal: Ἀγαύε	au: Agaue	av: Agave
ευ + vogal: εὐαγγέλιον	eu: euangelium	ev: evanxeo
ει: εἰρωνεία, εἶδωλον	i: ironia, idolum	i: ironía, ídolo
οι: οἰκονομία	oe: economia	e: economía
ου: βουκολικός	u: bucolicus	u: bucólico
ω: ὥδή / τραγωδία	o/oe: oda, trgoedia	o/e: oda, traxedia

Vogais breves



Vogais longas



3.4. Signos gráficos do grego

a) **Espírito:** Toda palabra que empeza por vogal leva un signo que indica a aspiración. Este espírito pode ser:

- **suave** (*ʹ*): non se pronuncia: ἀγαθός

- **áspero** (*ʼ*): Representa unha aspiración inicial (como “h” inglesa): ἔξ, ὑπερ; cf. Latín sex, super.

Nota: Tamén levan espírito áspero as palabras que comezan por ρ: ῥυθμός; cf. Latín rhythmus.

b) **Acento:** Tódalas palabras gregas levan acento, que pode recaer sobre unha das tres últimas sílabas da palabra. O acento grego presenta varios tipos:

- **Agudo** (*´*): Pode recaer sobre calquera vogal (breve, longa ou ditongo), dunha das tres últimas sílabas da palabra: ἄνθρωπος, ἀγγέλλω, μικρός

- **Grave** (*`*): É unha variante do agudo; o acento agudo na **última sílaba** da palabra transfórmase en grave cando lle segue outra palabra acentuada: ἀγαθὸς ἀνὴρ, pero ὁ ἀνὴρ ἀγαθός (atención ao dobre cambio).

- **Circunflexo** (*ˆ*): Representa unha elevación seguida dun descenso do ton, polo que só se coloca sobre vogais longas ou ditongos e só pode recaer nas dúas últimas sílabas da palabra: δῆμος, γλῶττα, Χαιρεφῶν.

Notas:

Cando os signos ortográficos (espírito e acento) afectan a ditongos, escríbense sobre o segundo elemento, pero lense como ditongos:

εὐρίσκω, οἶνος, αἶρω, βασιλεύς.

Cando a vogal inicial é maiúscula, os signos colócanse na parte superior esquerda:

Ἑλλάς, Ἄρτεμις, Ὅμηρος, Ἀγαμέμνων.

Realiza a πράξις 3

4. Marco xeográfico de Grecia



A Grecia antiga nunca constituíu un estado como é na actualidade, senón que cada πόλις (cidade-estado) era independente e tiña as súas institucións, a súa moeda e o seu exército. Sen embargo, os habitantes de todas aquelas πόλεις eran conscientes de falaren unha mesma **língua**, aínda que había variedades dialectais, e de compartiren unha mesma **cultura**. O conxunto destas cidades e territorios denominábase Ἑλλάς (Hélade) e os seus habitantes, Ἕλληνες (helenos). Eles percibían claramente esta realidade fronte ós demais pobos, ós que chamaban despectivamente βάρβαροι (bárbaros = que non falan grego).

A este sentimento contribuían poderosamente as festas e competicións que os helenos celebraban con asiduidade, sobre todo as máis importantes, como os Xogos **Olímpicos** ou **Píticos**, que tiñan carácter e alcance **panhelénico** (a eles acudían tódolos helenos, independentemente do lugar onde vivisen).

Na xeografía da Grecia antiga distinguimos as seguintes zonas (ver mapa):

4.1. Grecia continental:

a) Setentrional: No norte atópanse as rexións semibárbaras de Epiro e Macedonia. No noroeste está Tesalia, na que se atopa o monte **Olimpo**, suposta residencia dos deuses, que por iso se chaman **olímpicos**.

b) Central: Aquí están algunhas das cidades máis importantes na historia da Grecia clásica: **Delfos**, co famoso santuario panhelénico, a onde acudían tanto helenos como bárbaros para consultar o oráculo de Apolo; **Tebas**, famosa polo ciclo mítico ó que pertence Edipo, é a capital de Beocia; **Atenas**, capital da Ática; na época clásica convértese na cidade máis importante de Grecia, chegando a falarse do imperio ateniense.

c) Meridional ou **Peloponeso**: Está unida ó continente polo istmo de **Corinto**. As rexións e cidades máis importantes son:

- Élide, na que destaca **Olimpia**, sede dos primeiros **xogos olímpicos**, de ámbito panhelénico.
- **Arcadia**, zona central e illada; é a única do Peloponeso que non ten acceso directo ó mar.
- Argólide, con Argos, **Micenas** e **Epidauro**, como cidades máis salientables.
- Laconia ou Lacedemonia: A súa capital, **Esparta**, foi a antagonista de Atenas na época clásica.

4.2. Grecia insular

A península helénica ten a súa continuidade nas numerosas illas que salpican o mar Exeo:

a) Illas Xónicas. Así chamadas porque forman un pequeno arquipélago no mar Xónico (o actual Adriático); salientamos **Ítaca**, pola fama que alcanzou grazas á **Odisea** de Homero.

b) Illas Cícladas. Forman unha especie de círculo que é a prolongación da península ática no mar Exeo. Salientamos **Delos**, centro natural de todas, famosa polo oráculo de Apolo e sede do **tesouro** (Banco Central) da liga marítima ático-délica tralas Guerras Médicas. Tamén son dignas de mención **Paros**, famosa pola calidade do seu mármore, e **Naxos**.

c) Illas do Exeo oriental. Situadas fronte á costa de Asia Menor. Salientamos **Lesbos**, patria da poetisa Safo, e **Quíos**, unha das cidades gregas que se disputan a honra de ser patria de **Homero**.

d) Na desembocadura do Helesponto temos **Lemnos** (Atenea lemnia) e **Samotracia** (Vitoria de Samotracia).

e) Eubea e Espóradas do Norte: A illa de **Eubea**, situada fronte á costa oriental de Ática e Beocia, é unha das máis ricas e extensas. As cidades de Calcis e Eretria foron importantes centros de colonización. As Espóradas do Norte están fronte ás costas de Eubea; a máis salientable é **Esciros**.

f) Espóradas do Sur ou Dodecaneso. Situadas na zona sur da costa de Asia Menor. Destacan **Samos e Rodas**.

g) **Creta**. É a maior das illas gregas. No segundo milenio chegou a dominar o Exeo, exercendo unha poderosa influencia en toda a zona e tamén no continente grego, como se ve na arte **micénica**. A cidade máis importante naquela época foi Cnossos, onde residía o rei Minos e o mítico Minotauro.

4.3. Grecia colonial

A escaseza de terra fértil, o aumento demográfico, a invasión dos dorios e as loitas políticas son factores que se citan como causa de que os gregos emprendesen desde moi cedo o camiño da **emigración**, na procura de terras máis produtivas, pero tamén para fomentar as relacións comerciais. A **colonización** tivo varias etapas:

a) Unha primeira colonización dirixiuse, xa no ano 1000 a.C., ás costas de Asia Menor, ocupando distintas zonas segundo a orixe dos colonizadores:

- A zona norte, **Eolia**, foi ocupada polos eolios. Cidades salientables son **Troia** e Focea.
- Na zona central, **Xonia**, establecéronse os xonios. Esta zona foi a que alcanzou un maior nivel económico. Entre as cidades destacan Éfeso e, sobre todo, **Mileto**, que fundou novas colonias no Mediterráneo e no Mar Negro. En todas estas cidades había unha intensa actividade comercial e cultural, favorecida polas relacións que mantiñan cos pobos de Oriente. Esta é a explicación de por que foi aquí, e non no continente grego, onde naceu a **civilización grega**. Baste recordar que o primeiro dos *sete sabios* é **Tales de Mileto**.

b) A zona sur **-Dóride-** foi ocupada polos dorios, orixinarios do Peloponeso.

c) Máis tarde, entre os séculos VII e V a.C., a colonización diríxese a occidente, establecéndose no sur de Italia e en Sicilia (**Magna Grecia**), onde fundan cidades como Nápoles, Tarento e Siracusa.

d) Finalmente, os gregos fundan establecementos comerciais en tódalas ribeiras do Mediterráneo e do mar Negro. Cabe salientar Marsella, Ampurias, Náucratis en Exipto ou Cirene na actual Libia.



4.4. Xeografía mitolóxica

a) Montes: *Olimpo* en Tesalia; *Pindo* en Epiro; *Helicón*, *Citerón* en Beocia; *Parnaso* en Delfos; *Taixeto* en Esparta; *Parnés* e *Himeto* en Atenas; *Ida* en Creta e Troia.

b) Ríos: *Peneo* en Tesalia; *Aqueloo* en Etolia; *Alfeo* e *Cladeo* en Olimpia; *Cefiso* e *Iliso* en Atenas; *Simois* en Troia; *Eurotas* en Esparta; *Meandro* na Xonia asiática.

